

Sa Pasko 2020 "Na mis Mo Ba"
(ni Danilo C. Diaz)

Na mis mo ba ang 'yong sinta,
Ang pagpunta sa Luneta-
Dahil meron pa'ng pandemya
On-line muna kung magkita.

Na mis mo ba ang pagbili
Sa Divisoria at tiangge
May tawad at mura kasi
Nang mabigyan ay marami.

Na mis mo ba ang karoling,
Salo-salo at group bonding;
Mga batang makukulit
Na sintunado ang awit?


Na mis mo ba ang pagpasyal
Nang di bawal ang pag-akbay;
Sa lahat ay kumakaway
Nang mukha'y di tinatakpan?

Na mis mo ba ang tumawa
Nang kaylakas at may sigla?
Kapit-bahay, kapamilya'y
Sabay-sabay sa pagkanta.

Na mis mo ba ang carousel,
Ang pagsakay sa ferris wheel?
Kahit saan makarating,
Anong oras mang abutin.

Na mis mo ba ang mag-party
Nang di takot noa mahuli;
Magsayawan, mag -videoke
Kahit hanggang hating-gabi.

Na mis mo ba ang pagsimba,
Puto-bumbong at bibingka;
Ang panggising nang maaga'y
Katok at tugtog ng banda/



Na mis mo ba ang regalo
Ng ninong at ng ninang mo;
Tumanggap ng aginaldo
Nang di takot buksan ito.

Na mis mo ba ang panahon
Nang ikaw at ako noon
Ay nasa iisang bubong
Kapag Pasko't Bagong Taon.

dcd/dodie
24Dec2020

